



UKA2017/125

11/10-2017

Randi Vestergaard Evaldsen

Siunnersuut uunga: Kalaallit Nunatta pigisaannik sillimmasiisarfimmik pilersitsinerup iluaqutissartai aammalu aporfissarisinnaasaasa misissorneqarnissaanik, ilanngullugu pilersitsinerup suut piumasaqaatitariumaagai, soorlu aningaasartuutissat aammalu sulisussat pillugit Naalakkersuisut peqquneqassasut inatsisartut aalajangiiffigisassaattut siunnersuut.

(Inatsisartunut ilaasortaq Anthon Frederiksen, Partii Naleraq)
(Siullermeerneqarnera)

Demokraatiniit isumaqarluinnarpugut Namminersorlutik Oqartussat niuertuusaassanngitsut, niuertunullu namminersortunut unammillissanngitsut. Kissaatigaarput ingerlatsinermut piginnaanillit taakkuussasut suliffinnik ingerlatsisussat.

Takukulavallaarparput pisortat suliffinnut namminersortunut unammillertarnerat - tamanna suna tamaat atorlugu pinngitsoortittariaqarparput. Isumaqarpugut Namminersorlutik Oqartussat naalagaaffiup ingerlanneqarnissaa isumagissagaat - suliffinnik ingerlatsinatik namminersortut unammillerlugit. Tamanna pinngitsoortitassaraarput.

Sillimmasiisarfiit ullumikkut ingerlasut sillimmasiinerlut immikkut ilisimasaqartuupput - suliatic nalunngilaat, isumannaatsumik ingerlataraat. Namminersorlutik Oqartussat sillimmasiisarfimmik ingerlatsileriataassagaluarpata, taava pisortat allaffissornerat ingalluni alleqqissaq aamma oqarsinnaagunarpunga sulisussat ilarpassui avataaniik tikisittariaqassagigut, inatsisilerituunik, aningaasarsiornermut immikkut ilisimasalinnik assigisaanillu nunami maani amingaateqaratta, tamanna amerlasuutigut takusareerparput. Imaanngilaq sulisut avataaneersut akerlerigikka, imaluunniit nunatsinneersut atorusunngikkikka – avataaneersut ikilluaquakka, ilinniarsimasunik suli amingaateqaratta aammalu ajoraluartumik suli pisariaqartikkatsigit - una pineruara siunnersuuteqartup partiiata tunngaviusumik politikiani anguniagaammat tikisitanik tikisitsisannginnissaq.

Siunnersuuteqartup tunngavilersuinermini § 37 naapertorlugut apeqqutunut marlunnut akissutit innersuussutigai (2015-17 og 2015-98). Tassani Demokraatiniit Naalakkersuisut isumaqatigilluinnarpagut, Naalakkersuisut ilaatigut erseqqissarmassuk, Namminersorlutik Oqartussat namminersorlutik inuussutissarsiortunut unammillissanngitsoq, periarfissaqarallartillugu. Aamma tassani Naalakkersuisut aaliangiusimavaat, namminersortunik sillimmasiisarfeqanngitsuugutta ullumikkut atorsinnaasatsinnik, taava akiligassarpasuit assigiinngitsut toqqaannartumik landskarsimiit akilerneqartariaqartassagaluarput taamaasillutalu suli annerusumik aningaasaqarnerput aalarrajunnerussagaluarpoq.



Kissaatigaarput Namminersorlutik Oqartussat allaffiillu pisariillisaavigineqassasut. Isumaqarpugut namminersorluni inuussutissarsiortuuneq annertusarneqassasoq. Mannalu siunnersuut killormut eqqarsarneruvoq.

Taamatut oqaaseqarluta inassutigaarput siunnersuut itigartinneqassasoq.